

20131643960

L I G J
PËR NDRYSHIMIN DHE PLOTËSIMIN E LIGJIT
PËR AUTOMJETE

Neni 1

Në Ligjin për automjete ("Gazeta Zyrtare e Republikës së Maqedonisë" numër 140/2008, 53/11, 123/12 dhe 70/13), pas nenit 66 shtohen 15 nene të reja: 66-a, 66-b, 66-v, 66-g, 66-d, 66-gj, 66-e, 66-zh, 66-z, 66-x, 66-i, 66-j, 66-k, 66-ll dhe 66-l, si vijojnë:

"Neni 66-a

(1) Provimin profesional nga neni 66 paragrafi (1) i këtij ligji, mund ta japë personi i cili i përmbush kushtet në vijim:

- të jetë shtetas i Republikës së Maqedonisë,
- të ketë vendbanim në Republikën e Maqedonisë dhe
- të ketë mbaruar fakultetin e makinerisë ose shkollën e mesme teknike degën e makinerisë, komunikacionit ose elektroteknikës.

(2) Provimi nga neni 66 paragrafi (1) i këtij ligji, përbëhet prej pjesës teorike, me të cilën kontrollohet njohuria teorike e kandidatëve, jepet me shkrim në mënyrë elektronike, me përgjigje të numrit të caktuar të pyetjeve në formë të zgjidhjes së testit elektronik në kompjuter.

(3) Bazat e pyetjeve për pjesën e parë të provimit nga paragrafi (1) i këtij neni i përpilojnë profesorë universitarë nga sfera e automjeteve dhe persona me së paku dhjetë vite përvojë pune në sferën e automjeteve, në pajtim me nenin 66 paragrafi (2) të këtij ligji,

(4) Pyetjet e provimit i verifikon Komisioni për dhënien e provimit profesional nga neni 66 paragrafi (1) i këtij ligji, e njëherit kryen edhe revizion dhe azhurnim të bazave të pyetjeve së paku një herë në vit.

(5) Punët profesionale dhe administrative për nevojat e zbatimit të provimit profesional nga paragrafi (1) i këtij neni, i kryen Ministria e Punëve të Brendshme, ndërsa provimin teknikisht e zbaton personi juridik i regjistruar në Regjistrin Qendror, i zgjedhur nga ministri i Punëve të Brendshme.

(6) Gjatë revizionit, Komisioni nga neni 66 paragrafi (1) i këtij ligji, veçanërisht i ka parasysh ndryshimet e rregullave juridike në të cilat bazohen pyetjet, numrin e kandidatëve të cilët i janë përgjigjur, suksesin në përgjigjen e tyre, si dhe kriteret tjera që mund të ndikojnë në përmirësimin e cilësisë së bazës nga paragrafi (3) i këtij neni.

(7) Anëtarët e Komisionit për Verifikim, në pajtim me nenin 66 paragrafi (1) i këtij ligji, kanë të drejtë kompensimi me para që e përcakton ministri i Punëve të Brendshme dhe i njëjti caktohet në bazë të numrit të pyetjeve të përpiluara, si dhe nga ndërlikueshmëria e materies.

(8) Kompensimi vjetor në para nuk e tejkalon shumën e tri rrogave mesatare mujore të paguara në Republikën e Maqedonisë për vitin paraprak, të publikuara nga Enti Shtetëror i Statistikës.

Neni 66-b

(1) Provimin profesional nga neni 66 paragrafi (2) të këtij ligji, mund ta japë personi që i përmbush kushtet në vijim:

- të jetë shtetas i Republikës së Maqedonisë,
- të ketë vendbanim në Republikën e Maqedonisë dhe
- të ketë mbaruar fakultetin e makinerisë ose shkollën e mesme teknike degën e makinerisë, komunikacionit ose elektroteknikës.

(2) Provimi nga neni 66 paragrafi (2) i këtij ligji, përbëhet prej dy pjesëve si vijon:

- pjesa e parë (pjesa teorike), me të cilën kontrollohet njohuria teorike e kandidatëve, jepet me shkrim në mënyrë elektronike, me përgjigje të numrit të caktuar të pyetjeve në formë të zgjidhjes së testit elektronik në kompjuter dhe

- pjesa e dytë (pjesa praktike), ku kandidatëve që e kanë dhënë pjesën e parë (pjesën teorike) të provimit u kontrollohet aftësia praktike e kandidatëve për automjetin për çfarë duhet të përpilohet pëlqim për regjistrim ose letër për refuzim.

(3) Bazat e pyetjeve për pjesën e parë të provimit nga paragrafi (1) i këtij neni i përpilojnë profesorë universitarë nga sfera e automjeteve dhe persona me së paku dhjetë vite përvojë pune në sferën e automjeteve, në pajtim me nenin 66 paragrafi (2) i këtij ligji,

(4) Pyetjet e provimit i verifikon Komisioni për dhënien e provimit profesional nga neni 66 paragrafi (2) i këtij ligji, e njëherit kryen edhe revizion dhe azhurnim të bazave të pyetjeve së paku një herë në vit.

(5) Punët profesionale dhe administrative për nevojat e zbatimit të provimit profesional nga paragrafi (1) i këtij neni i kryen Ministria e Ekonomisë, ndërsa provimin teknikisht e realizon personi juridik i regjistruar në Regjistrin Qendror, i zgjedhur nga Ministria e Ekonomisë.

(6) Gjatë revizionit, Komisioni nga neni 66 paragrafi (2) i këtij ligji, veçanërisht i ka parasysh ndryshimet e rregullave në të cilat bazohen pyetjet, numrin e kandidatëve që u janë përgjigjur, suksesin në përgjigjen e tyre, si dhe kritere tjera që mund të ndikojnë në përmirësimin e cilësisë së bazës nga paragrafi (3) i këtij neni.

(7) Anëtarët e Komisionit për Verifikim, në pajtim me nenin 66 paragrafi (2) i këtij ligji, kanë të drejtë kompensimi në para, që e përcakton ministri i Punëve të Brendshme dhe i njëjti caktohet në bazë të numrit të pyetjeve të përpiluara, si dhe ndërlikueshmërisë së materies.

(8) Kompensimi vjetor në para nuk e tejkalon shumën e tri rrogave mujore mesatare të paguara në Republikën e Maqedonisë për vitin paraprak, të publikuara nga Enti Shtetëror i Statistikës.

Neni 66-v

(1) Kandidatit të cilit i është miratuar kërkesa për dhënie të provimit, i caktohet koha dhe vendi për dhënie të provimit, e kandidati njoftohet më së voni në afat prej tetë ditësh para dhënies së provimit.

(2) Kandidatit i mundësohet që të fillojë ta japë provimin në terminin e parë të ardhshëm nga dita e kërkesës së miratuar për dhënie të provimit.

(3) Provimi jepet në lokal për dhënien e provimit, të pajisur veçanërisht për dhënien e provimit profesional me pajisje materiale teknike dhe informatike, lidhje interneti dhe pajisje për incizimin e dhënies.

(4) Publiku informohet për datën dhe kohën e dhënies së provimit së paku tri ditë para mbajtjes së provimit.

(5) Dhënia e provimit nga paragrafi (1) i nenit 66 të këtij ligji incizohet dhe drejtpërdrejt emitohet në ueb faqen e Ministrisë së Punëve të Brendshme, e nëse për shkaqe teknike incizimi ndërpritet, incizimi i provimit të plotë vendoset në ueb faqen e Ministrisë së Punëve të Brendshme.

(6) Dhënia e provimit nga paragrafi (2) i nenit 66 të këtij ligji incizohet dhe drejtpërdrejt emitohet në ueb faqen e Ministrisë së Ekonomisë, e nëse për shkaqe teknike incizimi ndërpritet, incizimi i provimit të plotë vendoset në ueb faqen e Ministrisë së Ekonomisë.

(7) Personi juridik që e realizon provimin profesional, duhet t'i përmbushë kushtet hapësinore dhe pajisjen materiale teknike dhe informatike në lokalet për dhënien e provimit profesional, kushte të cilat më afërsisht i përcakton ministri i Punëve të Brendshme.

(8) Kriteret në lidhje me kushtet hapësinore dhe pajisjen materiale teknike dhe informatike të lokaleve për dhënien e provimit profesional, i përcakton ministri i Ekonomisë.

(9) Në lokalin për dhënien e provimit nga neni 66 paragrafët (1) dhe (2) të këtij ligji, gjatë dhënies së provimit janë të pranishëm dy përfaqësues nga komisioni për dhënien e provimit, një përfaqësues nga Ministria e Shoqërisë Informatike dhe Administratës (informatikanë) dhe një përfaqësues nga Qeveria e Republikës së Maqedonisë me propozim të Zyrës së Kryetarit të Qeverisë.

(10) Gjobë në shumë prej 4 000 deri në 5 000 euro në kundërvlerë në denarë do t'i kumtohet personit të autorizuar juridik që e realizon teknikisht provimin nga paragrafi (5) neni 66-a i këtij ligji, nëse nuk e incizon, nuk e emiton drejtpërdrejt në ueb faqen e Ministrisë së Punëve të Brendshme dhe nëse nuk e vendos incizimin e provimit të plotë në ueb faqen e Ministrisë së Punëve të Brendshme.

(11) Gjobë në shumë prej 4 000 deri në 5 000 euro në kundërvlerë në denarë do t'i kumtohet personit të autorizuar juridik që e realizon teknikisht provimin nga paragrafi (5) neni 66-b i këtij ligji, nëse nuk e incizon, nuk e emiton drejtpërdrejt në ueb faqen e Ministrisë së Ekonomisë dhe nëse nuk e vendos incizimin e provimit të plotë në ueb faqen e Ministrisë së Ekonomisë.

Neni 66-g

(1) Para fillimit të dhënies së provimit profesional, përfaqësuesi nga ministrinë kompetente, që e organizojnë provimin, e përcakton identitetin e kandidatit me shikim të letërnjoftimit.

(2) Kandidatit, gjatë kohës së dhënies së pjesës së parë të provimit, nuk i lejohet shfrytëzimi i ligjeve dhe akteve nënligjore, telefonit mobil, aparateve kompjuterike portative dhe mjeteve tjera teknike dhe informatike, sendeve të përgatitura paraprakisht dhe ngjashëm.

(3) Kandidatit, gjatë kohës së dhënies së pjesës së parë dhe të dytë të provimit, nuk i lejohet të kontaktojë me kandidatë ose persona tjerë përveç me informaticientët, në rast se ka problem teknik me kompjuterin.

(4) Nëse problemet teknike me kompjuterin mënjanohen për pesë minuta provimi vazhdon, e nëse nuk mënjanohen në këtë afat, provimi ndërpritet vetëm për atë kandidat dhe do të mbahet në afat prej më së shumti tri ditësh nga dita e ndërprerjes së provimit.

(5) Nëse ka probleme me më shumë se pesë kompjuterë dhe ato nuk mënjanohen në afat prej pesë minutash provimi ndërpritet për të gjithë kandidatët që e japin provimin dhe do të mbahet në afat prej më së shumti tri ditësh nga dita e ndërprerjes së provimit.

(6) Nëse kandidati gjatë dhënies së pjesës së parë dhe të dytë të provimit, vepron në kundërshtim me paragrafët (2) dhe (3) të këtij neni, nuk do t'i lejohet dhënia e mëtejme e provimit në atë termin të caktuar.

(7) Në rastet nga paragrafi (6) i këtij neni, konsiderohet se kandidati nuk e ka dhënë provimin profesional dhe kjo konstatohet në procesverbalin për dhënien e provimit profesional.

(8) Përfaqësuesit e autorizuar nga ministrinë kompetente që e organizojnë provimin, gjatë kohës së dhënies së provimit nuk guxojnë të qëndrojnë më gjatë se pesë sekonda në afërsi të kandidatit që e jep provimin, përveç në rast të mënjanimit të problemit teknik, kur nuk guxojnë të qëndrojnë më gjatë se pesë minuta.

(9) Gjobë në shumë prej 500 deri në 1 000 euro në kundërvlerë me denarë do t'i kumtohet përfaqësuesit të autorizuar nga neni 66-b paragrafi (4), nëse vepron në kundërshtim me paragrafin (8) të këtij neni.

(10) Gjobë në shumë prej 4 000 deri në 5 000 euro në kundërvlerë me denarë do t'i kumtohet institucionit të autorizuar që e realizon provimin, nëse nuk e ndërpret provimin në pajtim me paragrafët (4) dhe (5) të këtij neni.

Neni 66-d

(1) Provimi profesional nga neni 66 paragrafët (1) dhe (2) të këtij ligji, fillon me dhënien e pjesës së parë të provimit (pjesës teorike).

(2) Pjesa e dytë e provimit nga neni 66 paragrafi (2) i këtij ligji, jepet në afat prej së paku 15 ditësh pas dhënies së suksesshme të pjesës së parë.

(3) Ministri i Punëve të Brendshme me Rregullore e përcakton mënyrën e ndarjes së pikëve në provimin nga neni 66 paragrafi (1) të këtij ligji.

(4) Ministri i Ekonomisë me Rregullore e përcakton mënyrën e ndarjes së pikëve në provimin nga neni 66 paragrafi (2) të këtij ligji.

Neni 66-gj

(1) Pjesa e parë e provimit jepet për çdo sferë përkatëse dhe përmban së paku 50 pyetje me pesë opsione për rrethim prej të cilave një është i saktë, dy janë të ngjashëm, një është i pasaktë në masë të vogël (në të humben numër i vogël pikësh) dhe një është i pasaktë në masë të madhe (në të humben numër i madh pikësh).

(2) Kusht për dhënien e pjesës së dytë të provimit nga neni 66 paragrafi (2) i këtij ligji, është që kandidati ta japë pjesën e parë të provimit.

(3) Nëse kandidati nuk e ka dhënë pjesën e parë të provimit në pajtim me paragrafin (2) të këtij neni, do të konsiderohet se provimin nuk e ka dhënë.

Neni 66-e

(1) Pjesa e dytë e provimit nga neni 66 paragrafi (2) i këtij ligji përbëhet nga shembulli praktik, respektivisht bëhet identifikimi dhe vlerësimi i gjendjes teknike të automjetit për të cilin duhet të përpilohet pëlqim për regjistrim ose letër për refuzim në formularë të numërtuar.

(2) Nëse kandidati nuk e ka dhënë pjesën e dytë të provimit nga neni 66 paragrafi (2) i këtij ligji, do të konsiderohet se nuk e ka dhënë provimin.

Neni 66-zh

(1) Dhënia e pjesës së parë të provimit profesional bëhet me përgjigjen e numrit të caktuar të pyetjeve në formë të zgjidhjes së testit elektronik në kompjuter.

(2) Pyetjet e testit varësisht nga pesha, vlerësohen me pikë të përcaktuara në test.

(3) Dhënia e pjesës së dytë të provimit profesional nga neni 66 paragrafi (2) i këtij ligji, bëhet identifikimi dhe vlerësimi i gjendjes teknike të automjetit për të cilin duhet të përpilohet pëlqim për regjistrim ose letër për refuzim në formularë të numërtuar.

(4) Kandidati që e jep provimin praktik i plotëson Pëlqimin për regjistrim të automjetit ose letër për refuzim dhe varësisht nga formularët e plotësuar, ato vlerësohen me pikë.

(5) Pyetjet e përmbajtura në testet për dhënien e pjesës së parë të provimit profesional dhe përgjigjet e tyre nga neni 66 paragrafi (1) i këtij ligji, ruhen në sistemin unik elektronik për dhënien e provimit profesional në Ministrinë e Punëve të Brendshme.

(6) Pyetjet e përmbajtura në testet për dhënien e pjesës së parë të provimit profesional dhe përgjigjet e tyre nga neni 66 paragrafi (2) të këtij ligji, ruhen në sistemin unik elektronik për dhënien e provimit profesional në Ministrinë e Ekonomisë.

(7) Sistemet elektronike nga paragrafët (5) dhe (6) të këtij neni përmbajnë edhe bazë të kapshme publikisht prej së paku 100 pyetjesh për çdo sferë.

(8) Në sistemin elektronik përmbahet edhe udhëzimi për rregullat dhe literaturën në të cilat përmbahen përgjigjet e pyetjeve nga pjesa e parë e provimit.

(9) Numri i pyetjeve dhe shembujve praktikë në bazat nga paragrafi (7) i këtij neni, zmadhohet për 10 % në viti duke filluar nga viti 2015.

(10) Rezultatet nga dhënia e pjesës së parë të provimit nga neni 66 paragrafët (1) dhe (2) të këtij ligji, kandidati i ka të kapshme në kompjuterin në të cilin e ka dhënë provimin, menjëherë pas përfundimit të tij.

Neni 66-z

(1) Në ditën e dhënies së pjesës së parë të provimit nga neni 66 paragrafi (1) i këtij ligji, përfaqësuesi i Ministrisë së Punëve të Brendshme, kandidatit i jep kod të qasjes, përkatësisht fjalëkalim me të cilin i lejohet qasje në sistemin elektronik nga neni 66-zh i këtij ligji.

(2) Në ditën e dhënies së pjesës së parë të provimit nga neni 66 paragrafi (1) i këtij ligji, përfaqësuesi i Ministrisë së Ekonomisë, kandidatit i jep kod të qasjes, përkatësisht fjalëkalim me të cilin i lejohet qasje në sistemin elektronik nga neni 66-zh i këtij ligji.

(3) Pas lejimit të qasjes, kandidati merr test elektronik për pjesën e parë të provimit, të gjeneruara në mënyrë kompjuterike, përmbajtjen e të cilave sipas zgjedhjes së rastësishme e cakton softueri i sistemit elektronik nga neni 66-zh paragrafi (5) i këtij ligji, nga bazat nga neni 66-zh paragrafi (5) i këtij ligji.

(4) Pjesa e parë e provimit nga neni 66 paragrafi (1) i këtij ligji, përmban udhëzim për mënyrën e zgjidhjes së tij, për të cilin përfaqësuesi i Ministrisë së Punëve të Brendshme jep sqarim, para se të fillojë dhënia e provimit.

(5) Pjesa e parë e provimit nga neni 66 paragrafi (2) i këtij ligji, përmban udhëzim për mënyrën e zgjidhjes së tij, për të cilin përfaqësuesi i Ministrisë së Ekonomisë jep sqarim, para se të fillojë dhënia e provimit.

(6) Sistemi elektronik për dhënien e provimit nuk mund të lejojë ekzistimin e përmbajtjes identike të testit elektronik për pjesën e parë të provimit, në një termin për më shumë se një kandidat.

Neni 66-x

(1) Në rast të pengimit të realizimit të pjesës së parë të provimit nga neni 66 paragrafët (1) dhe (2) të këtij ligji, për shkaqe që shpiejnë në pamundësi teknike të funksionimit të sistemit elektronik nga neni 66-zh i këtij ligji, dhënia e provimit ndërpritet.

(2) Nëse shkaqet nga paragrafi (1) i këtij neni mënjanohen në afat prej 60 minutash nga ndërprerja e provimit, ai vazhdohet menjëherë pas mënjanimit të tyre.

(3) Nëse shkaqet nga paragrafi (1) i këtij neni nuk mënjanohen në afatin nga paragrafi (2) i këtij neni, provimi ricaktohet për termin tjetër.

Neni 66-i

(1) Kohëzgjatja e përgjithshme e kohës së caktuar për përgjigje të pyetjeve nga pjesa e parë e testit për dhënien e provimit, është 120 minuta.

(2) Konsiderohet se provimin e ka dhënë ai kandidat i cili me përgjigje të sakta të pyetjeve të testit ka marrë së paku 70% nga numri i përgjithshëm i pikëve të parapara pozitive.

Neni 66-j

(1) Kohëzgjatja e përgjithshme e kohës së përcaktuar për dhënien e pjesës së dytë të provimit nga neni 66 paragrafi (2) i këtij ligji, është 60 minuta.

(2) Konsiderohet se provimin e ka dhënë ai kandidat i cili me përgjigje të sakta të pyetjeve nga shembulli praktik, ka marrë së paku 70% nga numri i përgjithshëm i pikëve të parapara pozitive.

Neni 66-k

(1) Kandidatëve që e kanë dhënë provimin nga neni 66 paragrafi (1) i këtij ligji, u lëshohet Certifikatë për provim të dhënë në afat prej 15 ditësh nga dita e përfundimit të provimit.

(2) Kandidatëve që e kanë dhënë provimin nga neni 66 paragrafi (2) i këtij ligji, u lëshohet Vërtetim për provim të dhënë në afat prej 15 ditësh nga dita e përfundimit të provimit.

(3) Me kërkesë të kandidatit që ka dhënë provim nga paragrafët (1) dhe (2) të nenit 66 të këtij ligji, Ministria e Punëve të Brendshme apo Ministria e Ekonomisë, e informon për gabimet e bëra në testin për dhënien e provimit profesional, me mundësimin e shikimit të drejtpërdrejtë të testit.

Neni 66-II

(1) Materialet nga provimet e mbajtura, veçanërisht versionet në letër nga testet dhe formularët e numërtuar për pëlqim për regjistrim të automjetit ose aktvendim për refuzim të dhënies së provimit profesional dhe specimenet për kontroll të saktësisë së përgjigjeve të testit, si dhe incizimet nga provimet e mbajtura ruhen në Ministrinë e Ekonomisë.

(2) Ministri i Punëve të Brendshme formon Komision për revizion të provimeve të mbajtura nga neni 66 paragrafi (1) i këtij ligji, i cili në punën e vet i shfrytëzon materialet nga paragrafi (1) i këtij neni dhe në të cilin, krahas përfaqësuesit të Ministrisë së Punëve të Brendshme, marrin pjesë edhe përfaqësuesi nga Komisioni për dhënien e provimit dhe informatikani nga Ministria e Shoqërisë Informatike dhe Administratës, i caktuar nga Qeveria e Republikës së Maqedonisë.

(3) Ministri i Ekonomisë formon Komision për revizion të provimeve të mbajtura nga neni 66 paragrafi (2) i këtij ligji, i cili në punën e vet i shfrytëzon materialet nga paragrafi (1) i këtij neni dhe në të cilin, krahas përfaqësuesit të Ministrisë së Punëve të Brendshme, marrin pjesë edhe përfaqësuesi nga Komisioni për dhënien e provimit dhe informatikani nga Ministria e Shoqërisë Informatike dhe Administratës, i caktuar nga Qeveria e Republikës së Maqedonisë.

(4) Komisionet nga paragrafët (2) dhe (3) të këtij neni, mbajnë mbledhje së paku njëherë në vit dhe kryejnë revizion të mënyrës së realizimit të së paku dy provimeve të mbajtura në vitin rrjedhës.

(5) Komisionet nga paragrafët (2) dhe (3) të këtij neni, kanë të drejtë të kryejnë revizion edhe të mënyrës së realizimit të provimeve të mbajtura në pesë vitet e fundit deri në ditën e mbajtjes së mbledhjes së komisionit, por jo më herët nga dita e zbatimit të këtij ligji.

(6) Nëse Komisioni nga paragrafi (2) i këtij neni, konstaton parregullsi në zbatimin e provimit nga individë sipas nenit 66-e paragrafi (5) të këtij ligji, propozon heqje të Certifikatës për provim të dhënë nga neni 66 paragrafi (1) i këtij ligji.

(7) Nëse Komisioni nga paragrafi (3) i këtij neni, konstaton parregullsi në realizimin e provimit nga individë sipas nenit 66-e paragrafi (5) të këtij ligji, propozon heqje të Vërtetimit për provim të dhënë, në pajtim me nenin 66 paragrafi (2) të këtij ligji.

(8) Ministri i Punëve të Brendshme miraton Aktvendim për heqjen e Certifikatës për provim të dhënë nga neni 66-j i këtij ligji, në bazë të propozimit të Komisionit nga paragrafi (2) i këtij neni, në afat prej tri ditësh nga pranimi i propozimit.

(9) Ministri i Ekonomisë miraton Aktvendim për heqjen e Vërtetimit për provim të dhënë nga neni 66-j i këtij ligji, në bazë të propozimit të Komisionit nga paragrafi (2) i këtij neni, në afat prej tri ditësh nga pranimi i propozimit.

(10) Kundër Aktvendimit nga paragrafët (6) dhe (7) të këtij neni, mund të ngritet kontest administrativ para gjykatës kompetente në afat prej 30 ditësh nga pranimi i aktvendimit.

(11) Gjobë në shumë prej 1 000 deri në 1 500 euro në kundërvlerë me denarë do t'i kumtohet ministrit të Punëve të Brendshme apo ministrit të Ekonomisë nëse nuk e miraton aktvendimin në afatin e përcaktuar në paragrafin (7) të këtij neni.

Neni 66-I

(1) Lartësinë e kompensimit nga neni 66 paragrafi (10) të këtij ligji e përcakton ministri i Punëve të Brendshme në bazë të shpenzimeve të bëra reale për dhënien e provimit nga neni 66 paragrafi (1) i këtij ligji, të domosdoshme për zbatimin e provimit, përgatitjen e bazave të pyetjeve, realizimin e testit elektronik, përgatitjen e materialeve dhe thirrjeve dhe përgatitjen e Certifikatave për provimin e dhënë.

(2) Lartësinë e kompensimit nga neni 66 paragrafi (10) i këtij ligji e përcakton ministri i Ekonomisë në bazë të shpenzimeve të bëra reale për dhënien e provimit nga neni 66 paragrafi (2) i këtij ligji, të domosdoshme për zbatimin e provimit, përgatitjen e bazës me pyetje, për zbatimin e testit elektronik, për përpilimin e materialeve dhe ftesave dhe për përpilimin e Certifikatave për provimin e dhënë.

(3) Shpenzimet për dhënien e provimit nga neni 66 paragrafi (1) i këtij ligji, paguhen në llogarinë e veçantë të të hyrave personale të Ministrisë së Punëve të Brendshme.

(4) Shpenzimet për dhënien e provimit nga neni 66 paragrafi (2) i këtij ligji, paguhen në llogarinë e veçantë të të hyrave personale të Ministrisë së Ekonomisë.

(5) Nëse shpenzimet nuk janë paguar në llogarinë përkatëse të Ministrisë së Punëve të Brendshme apo Ministrisë së Ekonomisë, më së voni 15 ditë para ditës së caktuar për realizimin e provimit, kandidatit nuk i lejohet dhënia e provimit.

(6) Nëse kandidati në afat prej një viti nga dita e pagimit të mjeteve nuk e jep provimin, mjetet e paguara i kthehen në pajtim me ligjin.“

Neni 2

Për kundërvajtjet e përcaktuara me këtë ligj, procedurë për kundërvajtje do të mbajë dhe sanksion për kundërvajtje do të kumtojë gjykata kompetente.

Neni 3

Ministria e Punëve të Brendshme e vendos sistemin unik elektronik për dhënien e provimit profesional nga neni 66 paragrafi (1) i këtij ligji, në afat prej një viti nga dita e hyrjes në fuqi të këtij ligji.

Neni 4

Ministria e Ekonomisë e vendos sistemin unik elektronik për dhënien e provimit profesional nga neni 66 paragrafi (2) i këtij ligji, në afat prej një viti nga dita e hyrjes në fuqi të këtij ligji.

Neni 5

Aktet nënligjore të parapara me këtë ligj miratohen në afat jo më të gjatë se 120 ditë nga dita e hyrjes në fuqi të këtij ligji.

Neni 6

Sistemi unik elektronik nga nenet 4 dhe 5 të këtij ligji, do të vendoset në afat prej një viti nga dita e hyrjes në fuqi të këtij ligji.

Neni 7

Procedurat e filluara për dhënien e provimit profesional deri në ditën e fillimit të zbatimit të këtij ligji, do të përfundohen sipas dispozitave të rregullave sipas të cilave kanë filluar.

Neni 8

Ky ligj hyn në fuqi në ditën e tetë nga dita e botimit në "Gazetën Zyrtare të Republikës së Maqedonisë", ndërsa do të fillojë të zbatohet pas një viti nga dita e hyrjes në fuqi të këtij ligji.